

Ka An-anayan no Sulat ni Pablo ki

Timoteo

Ka Batasan no Oglitos to mgo Otow no Ogtuu

1 ¹ Ka soini no sulat, ogligkat kanak no si Pablo, no suguanon a ni Hisu Kristu su nigbobotan a to Magboboot no talagpangabang kanta. Woy nigbootan a rod ni Hisu Kristu no ian im-imanan ta. ² Igpaalap ku koykow, Timoteo, no ogkounawa ka to lagboy no anak ku to pogtuu ta ki Hisus. Ogbuyu a to Magboboot no Amoy ta woy si Hisu Kristu no Lagboy no Igbuyag ta oyow ogbuligan woy ogkohoy-uan ka woy to oyow ogbogayan ka ran to maawang no goinawa now.

Ka Bohog ni Pablo tongod to Ubat-ubat no Pog-anad

³ Timoteo, doromdoma nu ka innangon ku koykow nokani no oghondio a to Masidonia to og-awoson to dio ka pad og-ugpo to lunsud to Episu oyow ogkasaparan nu ka mgo otow no og-anad to tinuuan no kono no tu-tuu. ⁴ Woy nangoni nu sikandan to oyow oglingawan dan on ka mgo nangnangonon no waro pulus woy ka igpalista ran to mgo ngaran to mgo kaap-apuan dan ko hontow buwa, su ian do ogkoumaan to sikan ko ogpakatag-an do duon sikandan ko hondo longod ka tu-tuu ian no nangnangonon no ogmaal-ap-apuloy on. Ka sikan, kono ogpakabulig ko nokoy ka igpasabut to Magboboot kanta no ogligkat to pogtuu ta kandin. ⁵ Ka tuud ku to soini no igpasapad ku kandan su og-awoson no ogdakolon dan ka goinawa ran to duma ran no ogligkat to maawang no goinawa ran woy to waro salo dan to Magboboot, woy ogligkat dod to pogtuu ran no kono oglimanglimang. ⁶ Ian su duon mgo otow no nakasuwoy to sikan no in-anad noy no ogma-al-alukuyoy on to waro pulus. ⁷ Agad to ogkoiniatan dan no ogpang-anad to Balaod no inggalat dongan ni Moisis di waro dan sabuti ka ig-anad dan woy ka lagboy no igpangbaghot dan.

⁸ Nataga ki to maroyow ka sikan no Balaod no inggalat ni Moisis ko kono oghalinon ka tu-tuu no lituk din. ⁹ Di songo nataga ki to, ka Balaod, waro nohimu no igtambag to mgo otow no maroyow so batasan dan, di ian nohimu oyow ogkoudlingan ka mgo otow no

kono ogpaagad-agad woy ka oglop-ang to Balaod, unawa to mgo otow no kono ogtuu to Magboboot, woy ka makasasalo woy ka kono ogtahud kandin woy ka oghimatoy to inoy woy ko amoy ran, woy ka ogbunu ¹⁰ woy ka ogpanlibug, woy ka ogmool-olinoy, woy ka ogmandakop, woy ka mgo ubaton, woy ka mgo otow no nangon to kono no ogmalogot, woy ka agad hontow no oghimu to agad nokoy no kono ogkaayun to tu-tuu ian no tinuuan. ¹¹ Ka soini no in-anad ku, nigligkat to sikan no Maroyow no Nangnangonon no intalipun to Magboboot kanak. Sikandin ka mabogbog no oglitos to ogsayoon ta.

Ka igkarago ni Pablo to Pogkohoy-u to Magboboot

¹² Ogsayoon ku si Hisu Kristu no Lagboy no Igbuyag ta no nigpamanokal kanak to oyow ogpakatood a no oghimu to soini no insugu din. Ian su nigdoromdom sikandin to litos a rin no ogkasaligan, no sikan ian to nighimu a rin no suguanon din.

¹³ Nokani, nigmaroot ku ka ngaran din woy nigdootdootan kud sikandin woy nigbaybayaran kud ka mgo otow no nigtuu kandin. Dokad di, nohoy-uan a rod nasi to Magboboot su waro a pad nigtuu no waro a pad mataga to maroot ka oghimuon ku. ¹⁴ Sikan ian to, ka Lagboy no Igbuyag ta no si Hisu Kristu, dakol ian lagboy ka ingkohoy-u rin kanak no nabogayan a rin to pogtuu ku kandin woy to dakol no goinawa ku to mgo дума ku su ligkat to nasagboka ad on kandin.

¹⁵ Tu-tuu ian ka soini no nangnangonon no litos no ogtuon ta to waro igduwaruwa ta, to nighondii si Hisu Kristu to soini no tano oyow ogkapangabangan din ka mgo otow no makasasalo. No sikanak, labow ka kanak no salo to дума no makasasalo no otow

¹⁶ dokad di to nohoy-uan a rod nasi oyow ogpakitoo ni Hisu Kristu ka mgo otow no waro nigtuu kandin to malayat ka poggogoinawa rin kanak no duon dakol no salo. Ian su ogkoiniatan din to oyow songo ogtuu on sikandan woy to oyow songo ogkabogayan on to kouyagan dan no waro katamanan. ¹⁷ Ungod ta ogsayoon woy ogtahuron ka Magboboot. Sagboka ro sikandin no Magboboot no ian Lagboy no Igbuyag ta woy waro katamanan to pogsugu din. Kono ogkakitaan sikandin woy songo kono ogkamatoy.

¹⁸ Soini, Timoteo, ka igsugu ku koykow no anak ku to pogtuu ta no ogkaayun to sikan no impanangon to Magboboot nokani tongod koykow, su sikan ka igmanokal to goinawa nu kuntoon oyow maroyow ka pog-atu nu to agad nokoy no ogpakaatang to tu-tuu

ian no pogtuu ta. ¹⁹Sikan ian, layun nu ro gongoni ka pogtuu nu woy paagad-agad ka to tibo no natagaan nu no tu-tuu ian su duon mgo otow no wa nigpaagad-agad to natagaan dan no tu-tuu ian. No ligkat to sikan, naraat on ka pogtuu ran poron. ²⁰Si Himiniu woy si Alihandro ka ngaran to daruwa no nohonduo to sikan. Imbogoy ku sikandan ki Satanas oyow ogkababayaran no ogkaanad sikandan to kono dan ogmarooton ka Magboboot.

Ka Litos no Batasan to mgo Nigtuu

2¹Soini ka an-anayan no igbuyu ku koykow. Ampui now ka tibo no mgo otow. Buyu kow to Magboboot oyow igbogoy rin ka og-awoson dan woy sayaa now sikandin tongod to pogkohoy-u rin kandan. ²Woy ampui now ka mgo dakol no igbuyag woy ka agad hontow no ogpakaalap to dakol no katondanan oyow maroyow ka pog-ugpo ta to waro samuk, woy to oyow waro igkaatang kanta to ogtuman to ogkoiniatan to Magboboot woy to oyow maddoyow so mgo batasan ta to tibo no otow. ³Ka sikan no pog-ampu ta, maroyow woy ogpakabogoy to igkarago to Magboboot no (ian) talagpangabang kanta. ⁴Ogkoiniatan din to ogkapangabangan din ka tibo no mgo otow to salo dan, woy to oyow ogkataga sikandan to tu-tuu ian no tinuuan. ⁵Ian su sagboka ro ka Magboboot woy songo sagboka ro ka talaghusoy no si Hisu Kristu no ian tigpataliwaro to Magboboot woy ka mgo otow, ⁶no sikandin ka nigpakimatoy no igbalukas to mgo salo to tibo no mgo otow. No ligkat to sikan no nohimu to litos no allow, impamalogot din to ogkoiniatan din to ogkapangabangan ka tibo no mgo otow to mgo salo dan. ⁷Sikan ian to naabin a to Magboboot to oyow ogkohimu a rin on no suguanon ni Hisu Kristu woy to oyow ogkohimu a rin no talag-anad to mgo otow no konon Hudiu. Ian su oyow og-anad a kandan to tu-tuu ian no nangnangonon oyow duon pogtuu ran to tu-tuu ian no tinuuan. Tu-tuu ian ka kagi ku; kono no ubat.

⁸Sikan ian, tongod to mgo lukos no ogtuu no dio to agad hondo no ugpaan, ogkoiniatan ku to og-ampu sikandan. Di woy ran og-ampu, og-awoson to maawang ka goinawa ran to Magboboot ^awoy og-awoson dod to waro igkabolu dan woy songo waro igpaap-apuloy ran to agad hontow. ⁹No ka mgo boi no nigtuu,

^a8 Songo litos no igkababdad to “og-awoson no maawang ka goinawa ran ko igkayow ran ka bolad dan to og-ampu,” su songo batasan dan to igkayow ran ka bolad dan ko og-ampu.

ogkoiniatan ku to oglitoslitos ka pog-ilis dan to lawa ran oyow waro igkasipod ta ko nokoy ka ilisan dan. Og-awoson to kono dan ogpasublaan ka igmaroyow to bulbul dan woy ko sabinit dan unawa ko oghimasaran dan ka bulbul dan to buawan, woy ko mahal no baliog, woy og-awoson dan to kono dan ig-ilis ka lagboy no mahal no manggad. ¹⁰Di og-awoson to ian igkasayo kandan ka maroyow no oghimuon dan. Sikan ka litos to mgo otow no ognangon to ogsimboon dan ka Magboboot. ¹¹Woy og-awoson to og-ay-ayaran to mgo boi ka pogpamminog dan to ig-anad kandan to kono ogkagikagi sikandan, woy og-awoson to duon goinawa ran to ogpaagad-agad to ig-anad kandan. ¹²Kona a ogbogoy ko boi ka og-anad to mgo lukos dio to simbaanan woy ko ipaampow to katondanan to mgo lukos, di og-awoson to ogpamminog do duon sikandan to ig-anad kandan. ¹³Ian su si Adan ka inhun-a nigpamulingan to Magboboot woy rin atag si Eba,^b ¹⁴woy su kono no si Adan ka nagawayan ni Satanas, di si Iba ka nagawayan. No ligkat to sikan, niglop-ang on to boi ka insapad kandan. ¹⁵Dokad di, ko kono og-ongkoran to mgo boi ka pogtuu ran woy ko dakol ka goinawa ran to duma ran no ogtuman sikandan to ogkoiniatan to Magboboot to waro ogpakasolug no maroot duon to mgo batasan dan, ogkapangabangan sikandan ligkat to pog-anak dan. ^c

Mgo Udling tongod to mgo Pogbuyagon to mgo Nigtuu

3 ¹Tu-tuu ian ka soini no ignangon ku kaniu: ko duon lukos no ogkoiniat ko ogkohimu on no pogbuyagon to mgo nigtuu, maroyow ian ka ogkoiniatan din. ²Sikan ian to og-awoson to, ka lukos no igbuyag to mgo otow no ogtuu, waro maroot no batasan din no igkoogot kandin. Woy og-awoson to sagboka ro ka asawa rin no kono ogpanlibug woy kono ogmagolgol to agad nokoy, woy ogkatapid so goinawa rin no molungangon, woy maroyow ka pogsagman din to mgo magaliug din, woy ogkatou sikandin no og-anad to mgo otow. ³Og-awoson to kono oglasinglasing ka igbuyag now woy to oyow kono no mabulut sikandin. Di og-awoson to mounngangon sikandin woy to kono ogsasamuk woy to kono oggogolgol to salapi. ⁴Og-awoson to maroyow ka pog-alap din

^b13 Ogekabasa to Genesis 2:7 woy 21.

^c15 Songo kuwo ko ian lituk ko ogkapangabangan ka boi ko og-anak, woy ko oglituk to ogkapangabangan sikandan to salo dan su ligkat ki Hisus no in-anak to boi unawa to innangon to Magboboot ki Iba dongan to Genesis 3:15.

to lunggunan din to oyow ogpakapaagad-agad ka mgo anak din woy to oyow ogtahuron dan sikandin, ⁵su ogkoomonu naan ka sikan no igbuyag to og-alap to mgo otow no ogtuu ki Hisu Kristu ko kono ogkatou sikandin no og-alap to kandin no lunggunan? ⁶Kono ogkaayun ko ka lukos no iam pad nigtuu ki Hisu Kristu ka oghimuon no igbuyag to mgo otow no nigtuu su songo kuwo buwa ko ogparakoldakol no ogkalogparan on sikandin to unawa to poglogpad to Magboboot ki Satanas. ⁷Woy og-awoson to maroyow ka mgo batasan din oyow songo ogtahuron sikandin to mgo otow no waro nigtuu ki Hisus, su ko kono, songo kuwo no ogkasamilian sikandin no ogkagawayan on ni Satanas.

Mgo Talagbulig dio to Simbaanan

⁸Ka mgo talagbulig to igbuyag to mgo otow no nigtuu, songo og-awoson to maroyow so batasan dan no litos to ogtahuron to mgo otow, woy to oyow ogkasaligan ko nokoy ka ignangon dan. Woy og-awoson to kono ogpanlasinglasing woy kono dan oggogolgol to salapi. ⁹Og-awoson to ogmaawang do ka goinawa ran to Magboboot ka oggongonan dan ka sikan no pogtuu ta no impohitaga to Magboboot kanta. ¹⁰Woy og-awoson no ogkoologon pad ka mgo batasan dan ko maroyow. No ko litos ian, litos no ogbutuan now on sikandan to katondanan to talagbulig to igbuyag to mgo otow no nigtuu. ¹¹No ka mgo boi no asawa ran, songo og-awoson to maroyow so batasan dan no litos to ogtahuron to mgo otow woy to kono dan ogtalosobon ka mgo duma ran woy to kono no ogmagolgol to agad nokoy woy to ogkasaligan sikandan. ¹²No ka mgo lukos no talagbulig to pogbuyagon to mgo nigtuu, songo og-awoson dan to sagboka ro ka asawa ran, woy to maroyow ka pog-alap dan to asawa ran, mgo anak dan. ¹³Ian su, ko maroyow ka pogbulig dan to mgo otow no nigtuu, ogkatimulon ka pogtahud to mgo otow kandan, woy kono ogkasipod sikandan no ognangonnangon to sikan no pogtuu ta ki Hisu Kristu.

Ka Tu-tuu ian no Tinuuan

¹⁴Ka ogsulat a to soini, og-iman-iman a to magaan a buwa ogpakapanumbaloy dio to kaniu. ¹⁵Di ogsulatan ku sikoykow to soini no ig-udling ku su oyow, ko duon igkatalantan ku pad, ogkataga ka ko nokoy ka litos no batasan ta ka nohimu on no mgo anak to Magboboot. Ian su sikanta no oglimudlimud no ogsimba kandin no

ian Magboboot no kono ogkamatoy, ian ta ogkounawaan ka mgo suloy woy mgo tangon no ogpakarigon to baloy su ogpakamalogot kinow to tu-tuu ian no tinuuan,¹⁶ su tibo kinow nataga to maroyow lagboy ka impohitaga to Magboboot kanta tongod to soini no tu-tuu ian no tinuuan ta to:

Nigpokootow si Hisu Kristu no nigligkat dio to Magboboot.

Woy nigmalogot to Gimukud to Magboboot to maroyow on ian si Hisu Kristu.

Nakitaan si Hisus to mgo diwata to Magboboot

woy innangonnangon on sikandin di to mgo otow no konon Hudiu

Woy duon on mgo otow no nigtuu on kandin kai to tano.

Woy nigbatun on sikandin dio to langit.

Mgo Talag-anad to Ubat

4¹ Pig-utas to Gimukud to Magboboot no impohitaga to uromo, duon mgo otow no og-iniug to pogtuu ran no ogpamminogan dan ka mgo busow no og-ubat-ubat kandan woy ogpaagad-akaran dan ka igpanganad no ogligkat dod to mgo busow.² No ka sikan no igpanganad, ogkaalap-alap to mgo otow no og-iling to magtu-tuu dokad di ubat ka ig-anad dan, no kono ogmasakit so goinawa ran to mgo batasan dan su ka goinawa ran, konad oggoram su ian ogkounawaan ka laplap to ayam no nabanosan on to nigbaga no putow.³ Og-anad sikandan to kono no litos ko duon ogpangasawa woy nahan dan no duon ngalap no kono no litos no igpakoon kanta. Di nighimu to Magboboot ka tibo no ngalap. No sikanta no nataga to tu-tuu ian no tinuuan woy nigtuu on kandin, litos no ogkoonon ta ka sikan, no ogsayoon ta ka Magboboot no nigbogoy kanta.⁴ Ian su maroyow ka tibo no ngalap no nighimu to Magboboot. No litos no ogkakoon ta no waro ogsamilian ta. Woy iglagkos ta ka pogsayo ta kandin.⁵ Ian su ligkat to innangon to Magboboot woy ka pog-ampu ta, ogdoromdomon ta no ka tibo no ogkakoon ta, maroyow on.

Ka Maroyow no Suguanon ni Hisu Kristu

⁶ Ko ka soini no ig-udling ku koykow, ig-anad nu dio to mgo duma ta no nigtuu ki Hisu Kristu, ogkohimu kad on no maroyow no suguanon din, woy ogdakol on ka koykow no pogtuu ligkat to ungod nu ogdoromdomon ka sikan no in-anad noy woy ka tu-tuu ian no tinuuan no og-unugon nu.⁷ Di kono ka ogpamminog to sikan no igbatbat no mgo ubat-ubat no waro niglitos to Magboboot

woy waro pulus. Di anara nu ka goinawa nu oyow ogpakatuman ka to ogkoiniatan din. ⁸ Duon malintok no pulus ta ko og-anaron ta ka lawa ta, di dakol ka pulus ko ogkaanad ki to ogpaagad-agad to ogkoiniatan to Magbobo-t su sikan ka ogpakabogoy kanta to maroyow no pog-ugpo ta kuntoon woy ko uromo no dio kinow on to langit. ⁹ Ka soini no ignangon ku, tu-tuu ian no litos ko ogtiboon ta ogtuuan. ¹⁰ Sikan ian, ogpoomotan noy ka talabau noy su ka Magboboot no kono ogkamatoy, sikandin ka og-im-imaan ta. Kandin ka litos no ogpangabang to tibo no mgo otow, di lagboy no talagpangabang to mgo otow no ogtuu kandin. ¹¹ Sugua nu woy anara nu ka mgo otow to soini no innangon ku koykow.

¹² Agad to kono ka pad amana no buyag, og-awoson to kono ogmalintok ka ngaran nu ligkat to sikan di og-awoson to maroyow ka kagi nu, ka mgo batasan nu, woy to dakol no goinawa nu to mgo otow, woy to dakol ka pogsalig nu to Magboboot woy to waro solug no maroot dio to goinawa nu, oyow ogkohimu kad on no ogpanang-ilingan to mgo otow no ogtuu ki Hisus. ¹³ Tagood to ogpokouma a dio to kaniu, soini ka oghimuon nu: basoi nu ka mgo otow to sikan no Tahan no Kasulatan no kinagian to Magboboot, anara nu woy udlingi nu. ¹⁴ Kono nu kalingawi, Timoteo, ka katondanan woy ka kabogbogan no imbogoy to Magboboot koykow ko nigtorong ka to bolad to mgo pogbuyagon to mgo nigtuu, ka nigkagian ka ran to kagi no nigligkat to Gimukud to Magboboot. ¹⁵ Un-unuga nu ka soini no mgo ig-udling ku kaniu woy poomoti nu ro to oghimu oyow ogpakakita ka tibo no mgo otow to ungod ogkatimtimulan on ka pogtuman nu to ogkoiniatan to Magboboot. ¹⁶ Doydoyawa nu ka batasan nu woy ka pog-anad nu, no noknokali nu to oghimu su, ko ogtumanon nu, sikoykow woy ka og-anaron nu, ogkabogayan to kouyagan no waro kataman.

Katondanan ni Timoteo to mgo otow no Ogtuu ki Hisus

5 ¹ Ka mgo buyagbuyag on no lukos, kono nu paagboti to ogsapad, di ko ognangonan nu sikandan, himulungi nu ro unawa ko amoy nu sikandan. No ka mgo lukos no harihari pad koykow, unawaa nu to pogpitow nu ko patalasulod kow. ² Ka buyag on no mgo boi, unawaa nu ka pogpitow nu ko inoy nu. No ka mgo boi no harihari koykow, unawaa nu to ataboy nu no maawanga nu ro ka goinawa nu kandan.

³Tantanuri now ka mgo boi no nabalu no waro ogkasaligan dan to pog-ugpo dan. ⁴Di ko duon anak dan woy ko apu dan, og-awoson dan to og-anad to oghun-on dan to ogdoromdomon to ogbogoy to igkatahud dan to inoy ran woy ko amoy ran, mgo apu dan oyow igbalos dan kandan to nigtagouro pad kandan ko bato pad sikandan su soini ka batasan no ogkoiniatan to Magboboot.

⁵No ka mgo boi no nabalu no waro ogkasaligan dan to pog-ugpo dan, ian dan ogkasaligan ka Magboboot. No agad maallow woy ko marusilom, og-ampu sikandan no ogbuyuon dan sikandin to pog-ugpo dan. ⁶Di ko duon balu no ian din do ogdoromdomon ka agad nokoy no igkarago din no kono no litos, ogkounawa to namatoy on sikandin agad to nabui dod ka lawa rin. ⁷Nangoni nu ka sikan no mgo balu to soini no ig-anad ku oyow ogpaagad-agad sikandan oyow waro igkasamili kandan. ⁸Di ko duon otow no nigtuu ki Hisus di kono ogtanudtanud to mgo sulod din no ogkohirapan no ogpakasalig poron kandin, woy lagboy ko kono din ogsagmanon ka marani rin lagboy, noongkoran din ka pogtuman din to pogtuu rin. Madmaroyow pa kandin ka mgo otow no wa mogtuu su ogsagman atag to karumaan din.

⁹No ko duon boi no nabalu no ogbutuan now to katondanan woy ko ogbuligan now to pog-ugpo din, kono nu ipalista ko wa pad nokouma to kohon-oman ka tuid din. Woy og-awoson to ka sagboka ro naasawa. ^{d10}Woy og-awoson to mohon-ing ka mgo otow no ogpakanangon to maroyow ka mgo nighimu rin unawa to nigtanudtanud to mgo bato, woy maroyow ka pogsagman din to magaliug, woy nigpoobos to nigbulig to mgo otow no nigtuu ki Hisus. Woy og-awoson to nigbuligan din ka mgo otow no nohirapan woy nigpoomotan din ka poghimu rin to agad nokoy no maroyow. ¹¹Di kono nud ilagkos isulat ka ngaran to mgo balu no bato-bato pad su mangkuan no ogkoumaan on sikandan to koibogan to lawa ran, ogkoiniatan dan on ko duon og-asawa man do kandan no oglingawan dan ka tuud dan poron ki Kristu. ¹²Ka sikan, ogkohimu on no salo dan su konad ogtuman ka innangon dan kandin. ¹³No kono no sikan do di ogkaanad dod ka sikan no mgo balu to ogkapogul no ungod ogpanpanumbaloy ro duon. Di kono no sikan do di ogpanalasobon dan ka mgo duma ran no ian dan ogsagmanon ka waro labot dan no ignangon dan ka kono no litos no igkanangon. ¹⁴Sikan ian, ka

^{d9} Songo kuwo kun ko ogkalituk sikan to og-awoson to waro din nigpanlibug to asawa rin ko nabui pad ka asawa rin.

maroyow ku ko ogliwan on ogkaasawa ka sikan no mgo nabalu on no boi no bato-bato pad oyow og-anak woy ogtantanuran dan ka pog-ugpo dan su oyow kono ki ogkasamilian to mgo otow no og-ogot kanta. ¹⁵ Ian ku igtambag to sikan su duon on mgo balu no bato pad no nigsuwoy on ka goinawa ran ki Hisus no og-unug on ki Satanas. ^{e16} Ko duon boi no ogtuu ki Hisus, woy duon dangob no boi no karumaan din no nabalu, og-awoson to sikandin ka ogbulig to sikan no karumaan din no nabalu no kono din poron igsalig to duma no mgo otow no nigtuu ki Hisus oyow ogkaayun dan no ogbulig to mgo balu no waro karumaan dan no ogkasaligan dan.

Mgo Udling tongod to mgo Pogbuyagon to mgo Nigtuu

¹⁷ Ka mgo pogbuyagon to mgo otow no nigtuu, ko maroyow ka pog-alap dan to katondanan dan, litos no ogdakolon now ka igbogoy now kandan no igsayo now. Di ian now lagboy og-awoson no ogbogayan ka sikan no mgo pogbuyagon no ogpoomot to ogpan-udling woy to ogpang-anad kaniu ¹⁸ su ka sikan, ogpokounug to Tahan no Kasulatan no kinagian to Magboboot no ingkasulat dongan to:

“Ko ogpapandiokan nu to baka ka trigu oyow ogkapupu, kono nu ogpungoton so bo-bo din.”

Woy duon dangob no ingkasulat to:

“Litos no ogkabayaran ka otow no ogtalabau.”^f

¹⁹ Ko duon otow no ogbayung to pogbuyagon to mgo nigtuu, kono now pamminoga ko waro daruwa woy ko tatolu no otow no ogpakapamalogot to tu-tuu ian ka ignangon.^g ²⁰ Ko duon pogbuyagon no ogliblibongon din ka salo din, sapari nu sikandin dio to tangkaan to tibo no mgo otow no ogtuu oyow songo ogkaallok ka duma. ²¹ Ka Magboboot, woy si Hisu Kristu, woy ka mgo diwata to Magboboot no pig-alam din, ian ku ogparinogon to soini no igsugu ku koykow, Timoteo su og-awoson no ogpaagad-akaran nu ka soini no mgo insugu ku. Ko ogpakaboboot ka, kono nu ogpangabangan ka agad hontow no makasasalo.

²² Ko og-alam ka to otow no oghimuon nu poron no pogbuyagon to mgo otow no ogtuu ki Hisus, kono ka ogkaragusu no ogtorong to bolad nu no og-ampu no igbogoy to katondanan su oyow kono ka

^{e15} Si Satanas ka ngaran to igbuyag to mgo busow.

^{f18} Deuteronomio 25:4; MAT 10:10; LUK 10:7

^{g19} Deuteronomio 17:6; 19:15

ogpakatapik to salo to songo otow. Og-awoson to ogdoyroyow ka oyow waro salo no ogpakatagu to goinawa nu. ²³ Tongod to masakit to gotok nu woy ka mgo dalu nu no malasi nu gorama, kono ka og-inum to woig do di inum ka ro to malintok do no inumanon. ²⁴ Duon salo to mgo otow no ogkakitaan ta lagboy no ogkatagaan tad to ogkalogparan to Magboboot sikandan. Di duon duma no mgo otow no ogpakasalo di ogpakaholos pad ka salo dan. Di duon allow no ogkabatukan on. ²⁵ Songo ogkounawa ro ka mgo maroyow no mgo hinimuan, ogkakitaan do, di agad to kono pad kuntoon ogkakitaan, duon dod allow no ogkakitaan on.

6 ¹ Ka mgo uripon no ogtuu ki Hisu Kristu, og-awoson to ogtahuran dan ka tagtuun kandan oyow kono ogmarooton to agad hontow ka ngaran to Magboboot woy ko ka pog-anad ta. ² Ko nigtuu ki Hisus ka tagtuun kandan, og-awoson to kono dan ogmalintokon ka pogtahud dan to tagtuun kandan ko ligkat to nataga to sikan, di og-awoson no ogdakolon dan atag ka talabau ran to tagtuun kandan su ka songo nigtuu ka ogbuligan dan no dakol so goinawa to Magboboot kandan.

Ka Ubat no Pog-anad, woy ka Pulus to Tu-tuu ian

Ka soini no ignangon ku koykow, songo ig-anad nu woy igpasabut nu to mgo otow no nigtuu. ³ Ko duon otow, agad hontow, no og-anad to dangob no tinuuan no kono og-uyun to tu-tuu ian no kagi to Lagboy no Igbuyag ta no si Hisu Kristu woy ka ig-anad ta tongod to ogmonuon ta oyow ogtumanan ta ka koiniatan to Magboboot, ⁴ ogkounawa to waro katagaan din di ogparakoldakol do duon woy duon maroot no ogkoiniatan din to ogpaap-apuloy ro duon tongod to mgo kinagian. No duon ian ogligkat ka ogkoimaima, mgo pogpoog-ogotoy mgo ogparo-dootoy, mgo pogpansob dan to duma ran no kono ogligkat to tu-tuu ian, ⁵ woy ka mgo samuksamuk. Sikan ka oghimuon to mgo otow no maroot so pogdoromdom dan woy naawo on to kandan no doromdom ka tu-tuu ian no tinuuan. Naan dan no ko ogpasakup sikandan to Magboboot, duon on dalan dan to ogpanalapi.

⁶ Tu-tuu ian to dakol ka pulus ko ogpasakup ki to Magboboot ko ogkalitos do to goinawa ta agad malintok ka pog-ugpo ta. ⁷ Ian su ko in-anak ki, waro naalap ta, no ogkounawa rod ian ko ogkamatoy ki, songo waro ogkaalap ta. ⁸ Di ko duon ogkoonon ta, mgo igpanginabo ta, sikan do ian poron ka ogkalitos ta. ⁹ Di ka sikan no mgo otow

no ogkoiniatan to ogparatu-datu, ogkaayat no ogpakasalo on no ogkounawa to ogkalit-ag on su ogkaalap sikandan to mohon-ing no mgo koiniatan dan no waro pulus no ogpakaraat to pogtuu ran woy ogpakabogoy kandan to mohon-ing no mgo masakit to goinawa ran. Lagkos to ogkohimu rod no ogkoubus on sikandan no ogkaraat. ¹⁰ Ko duon otow no oggogolgol to salapi, ian ligkatan to agad nokoy lunsud no maroot no batasan. Ligkat to sikan no pogkoibog dan to salapi, duon mgo otow no nig-ongkod to pogtuu ran no kuntoon, duon on dakol lagboy no igmasakit so goinawa ran. Ian ogkounawa to nounoy sikandan napano to tunud.

Mgo Udling ni Pablo ki Timoteo

¹¹ Di sikoykow atag Timoteo no suguanon ka to Magboboot, ligari nu ro ka sikan no maroot no mgo hinimuan, no ian nu ro ogtuuron ka batasan no maroyow. Woy unug ka to koiniatan to Magboboot. Hirosoni nu ka pogtuu nu ki Hisus. Dakola nu ka goinawa nu to mgo otow. Aguanta nu ka agad nokoy no igkabaybayari nu woy maroyow ko molungangon ka. ¹² Poomoti nu ka pogtuman nu to tibo no ingkasalig koykow tongod to pogtuu nu oyow ogkapurut nu ka igsayo koykow no kouyagan no waro katamanan. Sikan ian ka tuud to Magboboot koykow no pig-abin ka rin no nignangon ka to sikan no maroyow no pognangonnangon nu to pogtuu nu no dio ka to tangkaan to mohon-ing no mgo otow no ian nigpamalogot to kagi nu. ¹³⁻¹⁴ Ka Magboboot woy si Hisu Kristu, ka ogparinogon ku to soini no igsugu ku koykow to og-awoson nu to ogpaagad-agad ka to mgo insugu ku koykow woy ay-ayari nu to waro ogpakasolug no maroot woy to oyow waro igkoogot koykow taman to oglibong kai to tano si Hisu Kristu no ian Lagboy no Igbuyag ta. Ka Magboboot ka ogbogoy to kouyagan to agad nokoy, no si Hisu Kristu, ian ka nigmalogot to tu-tuu ian no tinuuan no dio pad sikandin to tangkaan ni Punsu Pilatu. ¹⁵ Igpaturan to Magboboot ka poglibong ni Hisus kai to tano ko litos din on no allow. Sikandin do ka tu-tuu ian woy ka mabogbog no Magboboot no oglitos to ogsayoon ta. Woy sikandin ka Datu no oglabow to tibo no datu woy Igbuyag no oglabow to tibo no mgo igbuyag. ¹⁶ Sikandin do ka ligkatan to kouyagan no waro katamanan no og-ugpo to lagboy no malayag no kono tad ogkaranian. Waro nakakita kandin woy kono songo ogkakitaan to mgo otow sikandin. Ogsayoon ta sikandin woy sikandin ka ogsugu to waro katamanan. Litos ian.

¹⁷ Timoteo, udingi nu ka mgo otow no nigtuu no duon dakol no salapi dan to oyow kono dan ogparakoldakol woy to oyow kono dan ogsaligan ka salapi dan no magaan do ogkoubus. Di ian dan do poron ogsaligan ka Magboboot no malasi ogbogoy kanta to agad nokoy to oyow ogkarago kinow. ¹⁸ Woy nangoni nu sikandan to oyow ogmohon-ingon dan ka oghimuon dan no maroyow oyow ogkohimu on sikandan no datu to batasan no magaan ogbogoy to otow no ogkaalang-alang to og-awoson dan woy to oyow ogpasublaan dan to igbogoy ran. ¹⁹ Ligkat to sikan no oghimuon dan, ogkohimu on no karoyawon dan no kono ogkaawo no dio kinow on uromo to Magboboot. Woy ogpakagongon sikandan to pogkouyag ran no waro katamanan no ian ian tu-tuu ian no pogkouyag ran.

²⁰ Sikoykow, Timoteo, ay-ayari nu paag-agari ka insalig ku koykow. Kono kad og-amut to sikan no mgo otow no ogpamatbat do duon to waro pulus no ogpakaalop-ang to kinagian to Magboboot, woy songo kono kad og-amut to mgo otow no ogpaap-apuloy tongod to nahan dan no dakol no katagaan dan. ²¹ Ian su duon on mgo otow no nigtuu on to sikan no tigbal no katagaan, no nakasuwoy on sikandan to tu-tuu ian no tinuuan.

Ogbuyu a to oyow ogkohoy-uan kow tibo ki Hisu Kristu.